

El dernière dè Zante

L'électricité est tchière!

Les vacances ont fait què pindant n'paire dè mois, du n'ai pus yeu l'occasion dè vos parler d'Zante èyè d'ses aventures. Rassurèz-vous: D'ai pris des notes pou n'nî in roublyî yeune qui mèrite el racontâdje.

Quand du vois Zante arrivér à l'heure du d'junér èyè qu'l n'fait nî djèlant, ç'n'est nî pou boire ène goutte ou bî ène pinte. Non, ç'est qu'il a dandjî d'in osti (ç'qui est rare) ou bî qu'il a co ène nouvelle stoumaquante à m'annoncér. L'aut' coûp, ç'î pou m'parlér dè s'facture d'électricité.

I v'noût dè r'çèvoir es' facture récapitulative pou l'année èyè t'nèz-vous bîn: Il avoût constaté(!) què vu què su ses acomptes, l paye 21% d'TVA èyè qu'su l'facture globale, il a co 21%, bîn, l paye 42% d'TVA! (Là, du s'roûs d'accoûrd avû li què ça fait tchière el kilowatt.) D'ai asprouvé dè li spliquî què vu qu'on li descomptoût ses acomptes TVA comprise, l n'payoût foque el TVA su l'surplus. Bah wète'. Comme l comprend aussi rète qu'ène tortue qu'on a mis su s'dos, austant pèter dins n'buse! Dè toutes façons, avû l'argumint qu'l m'a sorti après, ça n'chervoût à rîn d'insistér.

In effet, tout mourdreux quand il a compris (!) l'escroquerie, il a tèlèphoné à Intercom pou rouspèter avû in moncha d'mots du genre: inadmissib', injuste, grève, sabotage,

Eh bîn coumarâde, l'impyé dè l'aut' costé du fil li a répondu: « Nous sommes au courant Monsieur mais que voulez-vous, ç'est l'Europe! » Ca fait, dis-t-l Zante què pasquè les étrangers n'ont nî d'yards assèz pou s'lumér, nous, on doit payî l'doub'!

(A m'n'avis, el brave garçon qui l'a raisonné a compris tout d'suite qu'l d'visoût avû in brave homme, nî mèchant mais aussi tiestu qu'in baudet qui a mau ses pattes.)



Comme du vois voltî Zante, du n'voudroûs nî qu'l dallîge es' fai passér pou in simberlot in f'sant s'démonstration dins tout l'coron. Du sûs donc ran'mint dallé vîr Fine pou l'mett' au courant.

A prumière vue, elle esplique mieux qu'mi pasquè ni Milo 9 su 10, ni l'Sourd Pot, ni Madmwoiselle Lèyontine, bref, nî in visin en' m'a dit què Zante î pu biesse qu'in strain.

Notèz quand min-me què si Zante avoût là sté contaminér tout l'villâdje avû s'thèorie à l'ascèblot, on s'toût parti pou n'révolution!

On l'a scapè belle.

Françwès.

Roublyî = oublier/djèlant = gelant/dandjî = besoin/stoumaquante = époustoufflante/asprouvér = essayer/rète = vite/chervi = servir/mourdreux = grincheux/moncha = tas/lumér = éclairer/d'visér = parler, converser/du vois voltî = j'aime bien/qu'l dallîge = qu'il aille/simberlot = simple(simplot)/strain = botte de paille/à l'ascèblot = à l'à peu près/scapér = échapper.
(paye se prononce paille)